

# Vieuta d'energia – cussegl naziunal sa metta a la lavur

La debatta cuzza tschintg dis

DA CLAUDIA CADRUVI / ANR

■ **A partir da damaun tracta il cussegl naziunal l'emprim pachet. La vieuta d'energia è ina detga chargia. Passa tschient propostas per midadas statan sin rucca. Il segund pachet davart ina taglia sin energias suttametta il cussegl federal pir la primavaira. Il 2011 èsi stà fatg en in dai: Suenter la catastrofa da Fukushima ha l'emprim il cussegl federal e suenter il parlament decidì da sortir da l'energia atomara. Uss vai pli vess: Damaun cumenza il parlament a s'occupar da la strategia d'energia 2050. Tschintg dis impunda il cussegl naziunal per quest blicc gigantic da leschas che definescha cura tschentar giu las ovas atomaras e co vegnir tar novas fontaunas d'energia.**

## Tenutas endinadas

La constellaziun è sa midada pauc ils ultims trais onns. Anc adina èsi ils sanesters, la pcd, pbd ed ils verds che stantan en per la vieuta. Ed anc adina èsi la pps che refusa datschertamain ina sortida atomara e la pld che sa nuspescha d'in scumond absolut per questa tecnologia.

Suenter la debatta d'entrada vegni perquai er ad esser la pld e la pps che tschentan la dumonda da renviar la fatschenta. Las duas partidas giavischan ch'il cussegl federal suttamettia in pachet cumplain che cuntogna a medem mument gist era la refurma ecologica da taglia. Per gliez duvrassi numnadamain ina midada da la costituziun e perquai en



Era la geotermia vegn segir a dar anc bler da discussiunar en il futur.

KEYSTONE

mintga cas ina votazion dal pievel – senza ch'ils adversaris stuessan prender il referendum.

## Dauzar la taxa per spisgentar la KEV

Sche la proposta da renviar vegn refusada ha il cussegl l'emprim da decider davart las finamiras: L'ala sanestra vegn a pledar per in consum pli bass e l'ala dretga per ina produziun pli auta.

Pli impurtant che finamiras èn den-

tant mesiras: La KEV duai restar l'instrument per promover novs implants d'energias regenerablas. Il cussegl federal less anc dapli implants e perquai dauzar la taxa per finanziar la KEV: Fin uss custava questa taxa 1.5 raps per ura kilowatt, en l'avegnir duessi esser 2.3 raps.

Ils adversaris vulan salvar la taxa bassa. Per ils promoturs muntass quai in stop da promoziun, damai che 35 000 projects spetgan sin meds da la KEV.

## Protecziun da la natira versus ovas?

Grondas dispitas vegni a dar davart la forza d'aua. Ils ultims decennis han ins per exempel engrondì ils territoris che stantan sut protecziun. Duain ins uss – a favur da la vieuta d'energia – lubir ovas idraulicas en territoris protegids? Il cussegl federal less pussibilitar quai e vul declarar l'adiever d'energias regenerablas sco in interess naziunal. Uschia fissi pus-saivel da pasar giu ils interess, sch'ins vul

bajegiar implants en cuntradas da muntada naziunala. Ils sanesters e verds cum-battan tals intents.

## Ils furniturs na vulan betg spargnar

Per la vieuta na dovri betg mo dapli energia solara, idraulica e da vent, mabain era damain consum. En il center stantan renovaziuns da chasas e perscripiuns per importaders d'autos. Apparats ineffizients duain vegnir remplazzads.

Tar l'effizienz d'energia exista potenzial. Ma ils furniturs d'energia gudognan daners cun vender current ed han strusch interess ch'i vegn spargnà.

Il cussegl federal less dentant obligar ils furniturs cun perscriver finamiras. Ina maiorità da la cumissiun dal cussegl naziunal na vul savair nagut da quai, ina minorità propona in sistem da bonus-malus.

## Naginas ovas atomaras pli?

Pir il davos sa fatschentan ins cun las ovas atomaras. Il sboz da lescha preveda ch'ins na dastga bajegiar naginas novas ovas pli. En sasez ha il parlament gia decidì quai il 2011. Contestà è dentant sch'i vala per ils possessurs dad ovas veglias perscripiuns spezialas.

Il davos s'occupa il cussegl naziunal da l'iniziativa per ina sortida da l'energia atomara. Il cussegl federal propona da concepir la strategia d'energia 2050 sco cuntraproposta indirecta tar l'iniziativa dals verds. La cumissiun dal cussegl naziunal vul tractar las duas fatschentas da per sai.